

Na osnovu člana 33. Statuta Udruženja sudija/sudaca u Federaciji Bosne i Hercegovine, na prijedlog Predsjedništva Udruženja, na redovnoj Skupštini Udruženja, održanoj dana 13.11.2021. godine, Skupština Udruženja donosi sljedeći:

ETIČKI KODEKS ČLANOVA UDRUŽENJA SUDIJA/SUDACA U FEDERACIJI BOSNE I HERCEGOVINE

I. OPĆE ODREDBE

Član 1.

Ovim Kodeksom ponašanja članova Udruženja sudija/sudaca u Federaciji Bosne i Hercegovine (u daljem tekstu Kodeks Udruženja) utvrđuju se etička pravila i standardi ponašanja članova Udruženja u ostvarivanju njihovih prava i vršenju dužnosti.

Član 2.

Cilj Kodeksa Udruženja je očuvanje, afirmacija i unapređenje ugleda i dostojanstva članova Udruženja i jačanje povjerenja građana u sudijsku funkciju u svim sudovima u BiH.

Član 3.

Član Udruženja obavlja prava i dužnosti u skladu sa Ustavom F BiH, Statutom Udruženja sudija BiH i Kodeksom sudijske etike donesenom od strane VSTV-a, kao i drugim propisima i općim aktima i osnovnim moralnim načelima i standardima profesionalnog ponašanja.

Član 4.

Član Udruženja prilikom obavljanja svojih dužnosti sudije je obavezan poštivati etičke principe propisane Kodeksom sudijske etike, koji obuhvataju principe nezavisnosti sudija, nepristrasnosti, jednakosti, integriteta i doličnog ponašanja, te stručnosti i odgovornosti prema poslu.

II. ETIČKI PRINCIPI

Ustavnost i zakonitost

Član 5.

Dužnost je svakog člana Udruženja kao sudije da svoju funkciju obavlja u skladu sa ustavima, zakonima i međunarodnim ugovorima koji su dio pravnog poretka BiH i Federacije BiH, te

primjenjivati i druge propise koji su doneseni u skladu sa ustavima, zakonima i međunarodnim ugovorima.

III. HUMANOST I ETIKA

Član 6.

Član Udruženja kao sudija dužan je u profesionalnom postupanju i u privatnom životu ponašati se humano, te primjenjivati najviša etička načela u skladu sa standardima profesionalne i opšte kulture.

Dostojanstvo sudijskog poziva

Član 7.

1. Član Udruženja kao sudija dužan je u obavljanju svoje funkcije sudije obavljati svoju dužnost i aktivnosti izvan suda prema standardima ponašanja koji pridonose očuvanju ugleda i dostojanstva suda i sudijskog poziva.
2. Član Udruženja kao sudija mora izbjegavati svako ponašanje koje je nedostojno i koje stvara dojam nedoličnog sudijskog položaja, prihvatajući i ona ograničenja koja bi se drugim građanima činila opterećujućim.
3. Član Udruženja kao sudija dužan je čuvati ugled sudijskog poziva i položaja kroz pisanu i izgovorenu riječ.
4. Član Udruženja kao sudija u obavljanju dužnosti predsjednika suda ili predsjednika odjela ne smije stvarati atmosferu vlastite nadređenosti.
5. Član Udruženja kao sudija ne smije obavljati ni jednu javnu ili privatnu, plaćenu ili neplaćenu dužnost koja nije u skladu s položajem sudije.
6. Član Udruženja kao sudija ne smije dopustiti da njegova porodica neprilično utiče na njegovo postupanje i odlučivanje u obavljanju sudijskog poziva.
7. Član Udruženja kao sudija ne smije se koristiti ugledom svog poziva, kako bi ostvario ili unaprijedio svoje privatne interese, interese članova svoje porodice ili bilo čije druge interese.
8. Član Udruženja kao sudija ne smije dopustiti da članovi njegove porodice, zaposlenici u sudu i bilo ko drugi podređen autoritetu sudijske dužnosti prihvati dar, zajam ili uslugu za ono što bi sudija u obnašanju svoje dužnosti učinio ili propustio učiniti.
9. Član Udruženja kao sudija se izvan sudijske dužnosti ne smije baviti davanjem pravnih savjeta ili pružanjem pravne pomoći.

10. Član Udruženja kao sudija ni nakon prestanka sudijske dužnosti, osim ako to ne zahtijevaju pravila postupka, ne smije djelovati u bilo kojem svojstvu u predmetu u kojem je postupao za vrijeme obavljanja sudijske dužnosti, kao ni u predmetima koji su u vezi s tim predmetom.

Marljivost

Član 8.

Član Udruženja kao sudija dužan je uložiti sav svoj trud i znanje u ostvarivanje najboljih radnih rezultata, pazeći pri tom da količina ostvarenih zadataka ne bude na štetu njihove kvalitete.

Član Udruženja kao sudija je dužan u skladu sa svojim mogućnostima i interesima posvetiti se ne samo radnim zadacima i odgovornostima vezanim za rad i donošenje sudijskih odluka, već i drugim zadacima važnim za sudijski poziv i funkcionisanje suda.

Izvansudske aktivnosti člana Udruženja kao sudije ne smiju ometati njegovo redovno i uredno obnašanje sudijske dužnosti.

Sloboda udruživanja

Član 9.

Član Udruženja kao sudija ima pravo u okviru ogranaka Udruženja da djeluje, da saraduje sa članovima Udruženja sudijama iz drugih ogranaka u poduzimanju aktivnosti Udruženja.

Član Udruženja kao sudija može biti član i drugih udruženja koja rade na zaštiti i promovisanju sudijskog poziva, zastupati njihove interese i štiti njihovu nezavisnost i položaj sudske vlasti.

Odnos prema javnosti

Član 10.

Član Udruženja kao sudija je dužan u javnim istupima promovisati ugled sudijskog poziva.

Članu Udruženja kao sudiji je zabranjeno iznositi mišljenje o određenim sudskim postupcima koji su u toku i o odlukama sudova u tim postupcima.

Član Udruženja kao sudija može sudjelovati u javnim raspravama o pravu, pravnom sistemu i funkcionisanju pravosuđa.

Kada nastupa u javnosti ili kada komentira društvene pojave putem javnih sredstava informisanja, pisanih članaka, radio i televizijskih programa, na javnim skupovima, predavanjima i slično, član Udruženja kao sudija mora nastojati da njegov nastup bude zasnovan na propisima, a izneseni stavovi i njegovo sveukupno ponašanje u skladu sa odredbama ovog Kodeksa.

Član Udruženja kao sudija treba izbjegavati isticanje svoje ličnosti, te izražavanje svojih stavova i mišljenja tokom i u povodu postupka, naročito putem medija.

Odnos prema drugim članovima Udruženja, sudijama i zaposlenicima u sudu

Član 11.

1. Član Udruženja kao sudija dužan je korektno se odnositi prema svim zaposlenicima u sudu.
2. Član Udruženja kao sudija je dužan međusobno razvijati i održavati dobre kolegijalne odnose i stručnu saradnju.
3. Član Udruženja kao sudija dužan je pomagati sudskim saradnicima i savjetnicima u njihovom stručnom usavršavanju.
4. Član Udruženja kao sudija je dužan sudskim pripravnicima omogućiti usavršavanje pravnog znanja u sudskoj praksi, pri čemu treba nastojati da stečena znanja i primjena pravne teorije u praksi budu temeljiti.
5. Član Udruženja kao sudija je dužan kod sudskih savjetnika, saradnika i pripravnika razvijati etičko ponašanje u skladu sa ovim Kodeksom.
6. Član Udruženja je dužan razvijati dobre odnose i saradnju sa drugim članovima Udruženja, poštivati i štiti njihov ugled i integritet.
7. Član Udruženja je dužan provoditi stavove Skupštine i Predsjedništva Udruženja donesene i usvojene u skladu sa Statutom i pravilima i procedurama donesenim u skladu sa Statutom.

Poštivanje Etičkog kodeksa

Član 12.

Član Udruženja kao sudija ima pravo ukazati na ponašanje drugog člana Udruženja kao sudije, koje je suprotno odredbama ovog Kodeksa.

Pritužba zbog povreda Kodeksa Udruženja sudija, koju je učinio drugi član Udruženja sudija, dostavlja se Predsjedništvu Udruženja.

Predsjednik Predsjedništva Udruženja sudija će pritužbu proslijediti Sudu časti.

Sud časti će provesti postupak u skladu sa Pravilima o postupku pred Sudom časti.

IV. ZAVRŠNA ODREDBA

Član 13.

Ovaj Kodeks stupa na snagu protekom 8 dana od dana njegovog objavljivanja.

Danom stupanja na snagu ovog Kodeksa, prestaje da važi Kodeks donesen u junu 1999. godine

Predsjedavajuća Skupštine

Božana Banduka

Broj: 46-2/21

Mjesto i datum : Sarajevo,13.11.2021. godine.